

Тоомсрта үкрч

Сарпинск района „Путь Ленина“ колхозд 70 наста үкрч Нимә Дорджиевич Мишкиевд кӧдлмш дала. Кӧгшн ӧвгн Нимән гарт 200 толгъа бод мал бӕәнә. Тедниг цугтагъинь хӕлӕдж асрх кергтӕ. Нимән нег эрдмнь—газриг болн газрин идг медлгън. Үкрч болад 50 джил кӧдлдж йовх ӧвгн, хама ямаран хотхр, толгъа, нур, царнъ бӕӕхинь эврӕ тавн хургън мет меднӕ.

Энүнӕ үкр хӕрӱлх газрнъ, клетксӕр, загонсар ховалгъата. Тегӕд теднӕн диг-дарагъинь олдж идӱлнӕ. Нег участкд идӱлчкӕд, талдан участкур орулна. Тиигӕд малмуднъ данъгин сӕн идгтӕ газрар хӕрӱлгднӕ.

Партъ болн правительств мах, ӱс тос гаргългъар берк чинртӕ тӧр тӕвсиг үкрч Мишкиев сӕн меднӕ. Тегӕд эн дадмг үкрч, цуг аргъ-чидлӕн олзлдж, хӕлӕдж йовх малан сӕӕрӱлдж йовна.

Тоомсрта үкрч Мишкиев кӱч-колснӕ 300 ӧдр олчксн бӕӕнӕ. Октябрин 40-ч ӧӧнин байр-бахин сӕн ӧдрт хӕрӱлдж йовх үкрмӱдӕн йилгъӕн чинӕтӕ кех даалгъвр авб.

Н. НОВОСЕЛЬЦЕВ.